

# Шарма гор

Кузь нэм да бур шуд!

Эжва йывса войтырлөн газет




Петё 1929 восянь

Суббота, 2013 вося июнь 22 лун 74 (10661)-өд №

Верстьё йөзтөг керкайд пөлс (коми шусьёг)

## Эжва йывлөн слава

### Александр Алексеевич Лодыгин



Чужис 1930 вося ноябр 30 лунё Носимын. Усть-Куломской кылдочан конторалон Кужса участокын өлі рабочёйон да мастерон, Усть-Куломской леспромхозлон Носимса лесопунктын пурьясысьён. Коммунистической уджывса ударник.

Готырыскөд быдтис да велөдис вит челядьёс.

Уна вося бур уджысь сетисны «Уджывса ветеран» да юбилейной медальяс, почёт грамотаяс.

Оло Носимын.

## ТАЛУН - КАЗЬТЫЛАН ДА ШОГСЯН ЛУН



Война пансян воын Людмила Ильинична Мамонтовалысь (нывдырйи Рассыхаевалысь) нуисны тышкасыны вөрөгкөд куим вокөс. Медводдза лунясь босьтисны готыра да кык челядя Ольксанөс. 10 арёса нывкаёс колисны видзны кага. Но Людмила пышйис өпинь пыр, мед кольбодны медся ыджыд вокөс. Пристань дорё волі став сикт. Бөрдисны, кутчысылыны, ас вуж коть абу. «Коми колхозник» пароход бөрся вөтчылісны сикт помөдз. Лун кост мысти нуисны Ёгорөс, а арнас Григорийёс. Мөд вонас босьтисны 18 арёса Василийёс, Ульянаса техникумын агрономө велөдчөм бөрын 19

арёса Надежда чойсө, коді ёна доймаліс фронт вылын, во куйліс Ярославльса госпитальын, 1943 воын бергөдчис чужанино кок пөлөн. 1944 воын война вылө муніс нөшта өти вок, 18 арёса Владимир.

- Война вайис мян семьялы ыджыд шог. Бать-мамлон вөлім көкъямысөн. Квайтөн тышкасыны вөрөгкөд. Ольксан да Ёгор вописны туй ни пом. Да и война бөрын вөлі зэв сьёкыд. Но венім ставсө, - синвасө чышкалігмоз казтьыліс олома ань.

Гижөд да снимок  
Марина  
ДАДАШОВАЛОН.

## ТӨДӨЙ, МЫЙ ВЫЛЫС

### ТУРИСТАЛІСНЫ ВЕТЕРАНЫЯС

«Пожома ягын» туристалан слёт вылө чукөртчылісны районса ветераньяслон котыряс.

Найөс чолөмалісны райадминистрацияон веськөдлысьёс вежысь Н.А.Левченко да ветераньяслон райсоветса юралысь Г.А.Кравченко, сиисны ордысьысыяслы кыпыд лов да вермөмъяс.

Волісны Куломдінысь, Ручысь, Кебаньельысь, Аныбысь, Кужйысь котыряс. Найө петкөдлісны, кызди кужоны мунны карта серти, муртавтөг төдмавны судта да ылна, отсавны доймысьлы.

### ВОЧАВИДЗИС МЕДШӨР ВЕТВРАЧ

Июнь 18 лунё республикаса юралысьлөн общественной примитанінын вөлі телефона «веськыд йитөд» республикаса медшөр ветеринарной врач Т.П.Бурнадзекөд.

Районса олысьяслон юалөмъясон шыөдчис видз-му овмөс министерствоысь районлон юкөна начальник А.Р.Ярова. Чери кыйысь предпринимательясөс майшөдлө, мый Куломдінса ветстанция черилысь анализ вөчөмысь сьом босьтө став кыйөм чериысь, а оз 2-3 килограммысь. Помөсдінса кооперативлысь Сыктывкарса ветлабораторияөд быд кварталө босьтөны йөлысь вөчөм вөлөга радиация видзөдлөм могысь, коть сійө сөстөм. Корисны дугөдны. Куломдінса администрация юалис, позьбө кызкө пасьявны ас овмөсысь мөсьясөс.

### БОСЬТИС СОДТӨД ВИДЗЯС

Ульянаысь крестьянин овмөс кутысь Елена Евгеньевна Тарабукина сөрнитчөмөн босьтис манастырлысь кык видз.

Таөдз сылысь жө көртымаліс куимөс. Вештысьё турунөн. Быд видз вылысь куртөм юр лыдысь витөд пайсө кольбө манастырлы. Ытшкөм кузя сөрнитчис Евгений Тарабукинкөд, кодлөн эм трактор. Е.Е.Тарабукина ньөбис «Газель», кодөн и ваяласны турунөс.

### ОЗ ВУНӨДНЫ ВАЖСӨ

Джеджимса да Шөрьягса велөдчысьяс туялөны чужан му да вөчөны мукөд буртор.

Челядь лөсьодасны ас сиктсалысь да посёлоксалысь 13 гу - Великой Отечественнөй война вылө ветлысьяслысь, тылын уджалысьяслысь да мукөдлысь, кодьяслон гуяс бөрся дөзьоритны некодлы. Крестьяс отсалас вежны Дон овмөдчөминса администрация. Сидзжө выльмөдасны гижөдъяс. Челядь ас кион вөчисны бумагаысь дзоридзяс. Бур удж вылө челядьёс ышөдө чужан му туялан школаса музейон веськөдлысь З.С.Напалкова.

### ВОССИС ДЕРЕВАННОЙ ПОСЁЛОКЫН

Дереванной посёлокын воссис челядьлы ворсанін-ёнмөдчанін.

Школа да овмөдчөминса администрация пырөдчисны том йөзлөн районса советон котыртөм балаяслөн конкурсө да лоисны вермысьяс лыдын. Ворсанін кышөдөм вылө вичмис 20 сюрс шайт. Вөчис велөдчысьяслон 15 морта уджалан котыр, кодөн веськөдліс В.М.Игнатова.

### ЗУРГИС ДОЙМЫМӨН КАГАӨС

Июнь 16 лунё 18 час 40 минутын Куломдінын Советской улич вылын «Лада Гранта» машинаон веськөдлысь зураліс 2 арёса кагаөс, коді мамыскөд вуджис туй подаяслы урчитөм пас кузя.

Водитель эз босьт төдвылө шондіа лун, эз пукты пыдди туйывса пас да правилө.

Кага доймаліс, куйлө бурдөдчанінын.

Асланым да общ. корреспондентьяс, районлон сайт вылысь.

## КОМИ РЕСПУБЛИКАЫН

### ТӨЖД УЛЫН - СИКТСАЛӨН ДЗОНЬВИДЗАЛУН

Республикаса дзоньвидзалун кузя министерство босьтас торья төжд улө сиктыясын фельдшерско-акушерской пунктъяс кышөдөм. Та йылысь сөрнитисны правительстволон чукөртчылөм вылын, көні вөчисны кывкөртөдъяс дзоньвидзалун кузя министр Ярослав Бордоглон сиктса олысьяслы медицина отсөг бурмөдөм йылысь доклад серти.

Кызди висыталіс министр, 314 бурдөданінысь санитарной корөмъяслы лөсьялө сөмын 22. 2013 воын артыштөма кышөдны 21 бурдөданін, сы вылө мунас 118 миллион шайт.

Дзоньвидзалун вылө элясигөн сиктса олысьяса медводз шыөдчөны фельдшерско-акушерской пунктъясө. Та вөсна воысь-во содө налөн төдчанлун.

Сиктсаяслы медицина отсөг сидзжө сетөны овмөдчөминса да районса бурдөданінъяс. Районьясө ветлөны диагностика шөринысь, челядьлөн респуб-

ликаса бурдөданінысь специалистьяс.

Медым висьомъяс төдмавны кызд позьбө водзджык, 2010-2012 воясын 4 районса шөр больнична подув вылын котыртысны районьясостса шөриньяс (машина вылө меститөм диагностика комплексыяс). Тайө сетіс позянлун шымыртны 14 район, көні оло сиктсаяслөн 90 процентыс. 2012 воын районьясостса шөриньясысь специалистьяс видзөдлісны дзоньвидзалунсө 3,8 сюрс мортлысь.

Медым ёнмөдны медицина юкөнлысь материально-технической подув, 2013 воын дзоньтасьом вылө торйөдісны 90 миллион (2014-2015 вояс вылө 130 миллионысь унджык шайт), мебель, оборудование, санитарной транспорт вылө 147 миллион (2014-2015 вояс вылө 150 миллион шайт).

Кызди юөртис дзоньвидзалун кузя министерство, 2020 воөдз артыштөма котыртны өтувья практикаа врачьяслысь удж (Куломдін районын лоас Тимшерын, Немдінын да Югыдъягын).

Коми республикаса юралысьлөн да правительстволон пресс-служба.